

方山薛先生全集

方山先生全集卷之四十九

公移三

浙江學政

行各府作興社學牌

照得社學之設卽古閭師黨正之義養蒙訓俗莫先於此邇來有司簿書期會日不暇給其視社學誠若可緩不知童蒙失教長益兇狠獄訟繁興多由此起當職迂愚過爲探本之慮爲此將朱文公童蒙須知王陽明先生訓蒙大意發仰各府官吏即行所屬社學師生及各延師之家一體遵行肄習其童蒙須知一書倘刊刻未便即差的當人役或社學教讀量童

生多寡各給竹紙賫赴本道照數印回人給一冊使  
之便於誦習除社學教讀查照原行學政施行外其  
童生有能遵守教規背誦須知及四書本經白文者  
各該提調官籍記姓名候本道按臨類送覆試量與  
送入儒學充附其未成誦者不許一槩濫送庶幾日  
漸月摩知所興起其於風教不無萬一之助再惟牌  
內事理固本道迂愚之見各該提調官爲民師帥膺  
教養之責亦宜相與有成毋得玩視違悞

行各府正文體牌

照得文以取士正欲觀其涵養造詣庶幾爲明體適

用之學非徒藝焉爾也嘗觀浙中前輩所作場屋文字神精理明氣昌詞達法度森嚴脉絡通貫或舂容大篇或俊逸數語各因才性而成皆自胸中流出語學術直有以洞徹天人語治理真可以見諸行事故其所就亦自不凡夫何近年以來學校諸生知所崇尚者十無一二而沿習俗套者往往成風不問是何題目動用後開數語不惟無理且不成藝是蓋以聰明敏達之資溺於晏安游惰之習始以欺人終以自欺相率下流而不自知可惜也當職巡歷考校去處雖曾面諭而漫不省究者尚多自反化理無方以致

作人寡效夫復何辭但今科舉在邇誠恐諸生不痛加釐正間或有一二混登科第則今日之生負又將不免爲他日之主司文章與時高下關係不小訛以傳訛作何究竟當職迂愚過不自量殊切惶懼寧紹二府雖未經巡歷誠恐亦有此弊擬合通行爲此仰府官吏卽將牌內事理并後開慣用套語備云發屬儒學大書粘貼明倫堂壁督令諸生讀書窮理今後舉業文字務切題意語必由中依倣會試及兩京鄉試程式當自有得若仍前勦襲漫不省發改圖考校之日定置下等甚則革黜決不姑息

行各府申明職掌牌

照得本道職專提督學校凡事關學政及名宦鄉賢孝子順孫義夫節婦忠臣烈女等項係干風化者遵奉勅諭例該本道掌行各衙門不許侵越今照所屬各府州縣等衙門凡遇前項旌表典禮事情動輒通申合于上司及生員巧言俳語徑自驀越呈舉不惟事不歸一抑且難爲遵守及照各府州縣往往差委教官齎送批文揭帖問安獻勤不以教化爲重而不才教官亦往往卑諂承奉甘心服役有同走卒殊失師模除已往不究外仰府官吏即便轉行所屬州

縣并儒學及隣近衛所等衙門今後如遇舉保名宦鄉賢孝子順孫義夫節婦忠臣烈女係干旌表典禮學政事宜及教官會試致仕等項先行查勘明實覆覈無異轉呈本道以憑裁奪施行其各衙門如有批揭聽令別項人員不許仍前差委教官教官亦不許營求差遣雖遇各司道差委亦就備由申彼知會如有故違定將教官生員并該吏照例提究重治

行各府民間俊秀納監牌

照得民間俊秀許以附學名目納監該部題准事例委因邊餉不足設策招徠誠非得已仰府官吏即便

轉行所屬州縣有民間俊秀子弟願納監者該縣先行結勘身家無礙責令親齎應納銀兩照數驗足取具由結申詳本道批允以附學名目起送促令上納不許延捱詐竊衣巾如有批允半月之內不行赴納者各該府州縣即便查究重治仍每季將起送上納過姓名造冊開報查考毋得因循容隱

行各府禁革生員詞訟牌

照得生員在學猶女子在室不當犯義豈宜犯刑近據所屬各府州縣申詳招由往往以生員串作招頭問擬犯該笞杖以上既非公罪便於行止相干合當



革黜豈得再污學校却又槩稱贖完復學肄業揆之  
法律俱屬有違本道欲盡行查革但積習已久未經  
申明恐涉不教之虐除已往不追外合行戒諭爲此  
仰府官吏即便轉行所屬各縣并儒學一體遵照仍  
出給告示于明倫堂省諭諸生今後務要恪遵勅  
諭卧碑謹守律令條例保身惜行不許仍前與人訐  
訟輕至公門若係干已事情不得不告理者許父兄  
弟姪或家人出名具狀入官申訴各該衙門即與准  
理從公處斷如有不遵教法仍前好訟但犯該笞杖  
以上即係行止有虧依例問革申詳發落其有刁詐

之徒故意牽累生員者俱照依律例從重議擬一體具招呈報施行

行各府起貢牌

照得嘉靖三十一年各府州縣儒學生員例該歲貢已經通行查取外今照考貢在邇合再申明爲此仰府官吏轉行所屬各學起送歲貢生員雖係食糧年深曾經科舉者正貢一人陪貢一人尤要才學可觀操履無玷取具該府州縣掌印官并該學師生及里老排年隣佑人等各不扶結狀方許給文起送赴道考奪苟文藝雖工素行弗檢雖係正陪人數不許重

其材俊矜其末路假借優容濫行送考致壞士風聽  
於以次食糧年深曾經科舉生員志行卓立表出流  
俗者照前公同取結起送其有本無實行因而夤緣  
保舉希圖越貢者即係行止有虧定行罷黜

行杭嘉湖台四府諭新進生員牌

照得本道按臨衢嚴等處考試生員其文理荒謬不  
通者多係後生新進蓋緣此輩志氣淺陋一得衣巾  
便自滿足怠惰深孤前道原日遷就作興曲成人才  
至意因恐近來此習在處有之爲此仰府官吏即行  
該府并各縣儒學督令今年新進生員乘時奮志加

功以圖向進本道明春按臨該府考驗無有進益或  
荒疎者定行責黜决不輕貸以致冒濫

行金華府黜退生員何子良牌

本道按臨蘭谿歲考有生員何子良文理荒謬列置  
下等本生自恃曾經冒考前列不知自反遂懷忿懣  
輒對衆指稱該縣有一鄉官見恠將圖報復甚有挾  
持之意本道因思巡歷衢州之時經過該縣地方夜  
深寢息船倉俱已封鎖忽有一人駕船追趕遍帖被  
龍游縣巡捕官獲住天明送劉知縣審係蘭谿鄉官  
家人仍就與帖回還豈有見恠之理顯是本生造言

生事交構媒孽及訪其素行多係薄劣除案行黜退外爲照金華自昔多賢而蘭谿尤盛學校諸生正宜取法前修追媿往哲方不負作養何子良荒踈浮蕩旣壞文體影響假借又壞士風若不申明曉諭恐後生新進仍踵前弊爲此牌仰該府將何子良原日考卷一樣謄寫九本備云牌內事理轉行各屬儒學粘貼明倫堂壁俾諸生勿得效尤自取黜革

行紹興府提問教諭伍鑑牌

據新昌縣儒學申送生員格眼等冊到道查得冊開丁憂項下附學生員俞邦輅於嘉靖二十七年告稱

援例行學除名經今五年本道督學之任亦已三易  
前後案冊俱不開載該學奉何衙門明文輒復開報  
顯是本生先因畏避歲考捏告援例原情論法久該  
黜退今窺本道官更吏改竄緣該學希圖詐冒及查  
附學生員丁必朝呂道化張時華各丁憂年月俱服  
闋已久該學仍作丁憂不行開明希圖避考通屬違  
法參照教諭伍鑑叨居學職濫預士流縱不能爲典  
教之師儒却乃同於舞文之胥吏義固難容法所必  
究爲此仰府官吏即提伍鑑并俞邦輅等到官逐一  
審究贓賄情弊明白照依律例議擬具招詳報施行

行台州府提問知縣尹尚孔牌

照得台州建設按察分司數多本道按臨考試自有相應居住去處况一應蓬廠禁約等項已先行該府轉行所屬臨海縣查照去訖該縣官吏不行遵守輒將本道勅印送入府館不惟堂除窄隘難容生徒不堪校藝抑且墻垣破壞逼近吏舍有礙關防及至分付更易却於永盈倉內搭蓋蓬廠浪費綵段纏裹簷楹徧鋪氈褥及於溷廁似此舉動通屬故違叅照得知縣尹尚孔本以市井之流叨膺司牧之寄專心承奉罔知學政當先刻意經營將謂上情可得不思

節省惟事浮華合示小懲用爲大戒爲此牌仰台州府提調正官查照原行禁約卽提本官并承行該吏問擬應得罪名庶肅官箴以嚴吏治

行紹興府更定祠額牌

照得本道巡歷紹興見陽明王先生祠以新建伯題額因思先生豪傑之才聖賢之學真有繼往開來之德不止勤事捍患之功若專以封爵題額竊恐後學之所以崇奉景行者不專在是該府提調正官崇尚正學爲此牌委更定直書曰陽明先生祠製匾懸揭完日仍將發去告文或親詣行禮或委有學行教官



代行庶見崇奉大儒興起後學之意

行台州府查死事官員牌

照得近日浙東海寇猖獗殘害地方黃巖一縣被禍尤慘台州府知事武暉獨能奮不顧身與賊抗戰死於鋒鏑雖係小官實明大義禮以死勤事則祀之本道叨理學政風化所關相應查處爲此仰府行學師生從公結勘并行各處衛所如有指揮千百戶等官一體死事者通行查報以憑議處施行

行各府查學田牌

照得置立學田以給貧士固教養之盛舉清理租稅

以明出納亦義利之大端各府州縣原有學田者本道已經通行案驗內一款要將田租數目收支規則開報查考去後僅有一二府縣開報其餘不見明白回覆顯是各學教官不行造報各該府縣以致廢閣中間覬覦侵漁情弊難保必無擬合通行查理爲此仰府卽查所屬儒學并各書院如置有前項學田逐一清查明白備將坵段畝數收支規則租稅數目佃戶姓名并舊管新收開除實在明立前件攢造循環文簿二扇送道印鈐一本存道一本發回該學收照每年將收放過數目登記在簿按季申呈本道循去

環來倒換查考以垂永久其原未置有前田者亦要  
回報明白如有學田處所仍前不行開造者定提該  
學官吏通行究問

議金華府宋景濂先生立祠呈

看得宋景濂先生格心之學華國之文遭遇昌期贊  
襄洪業創立學校以明倫制作禮樂以飾治稽其立  
德立功立言昭然可述揆之祭義祭法祭統允矣不  
誣且今成都爲遷葬之地尚有賜田矧茲浦江乃誕  
生之鄉可無專祀該府議將廢寺屋木田地經畫區  
處建立祠宇以妥安神主仍編均徭門子一役常川

看守似爲允當但餘田一十一畝六分七釐地三畝四分欲查訪宋氏同宗一人聽其立籍管業雖若興廢繼絕不無啓僞長奸賢者無後自古有之小利必爭于今爲甚不認梁公者百無一二甘拜子儀者十常二三所據查訪宋氏繼祀一節似難允議前田租穀相應徵收在官或照各處學田規則積貯在學常賦之外以爲春秋二祭之費每歲免加丁田銀六兩亦所謂寬一分則民受一分之賜也其餘依擬准行該縣建造祠宇擇日興工仍委廉幹官一員董理嚴禁冒破侵漁之弊工完具由通行申報

議紹興府學教授梁以蘅侍養呈

看得教授梁以蘅學行俱脩年力未艾爲親辭官雖  
出至情爲官擇人似難遽允合無行令該府仍留本  
官照舊供職

議寧波府舒文靖公等立祠呈

查得宋史係元人所脩舒文靖公不列於道學儒林  
而僅附於別傳固無足憑但慈谿有楊文元公定海  
有沈端憲公同宗陸學妙悟傳心純明易簡不涉支  
離象山稱許則寔出於文靖之右今其所生之地皆  
屬該府若獨祀文靖而遺二公恐亦未安古人臨于

戈而興俎豆誠不當以軍需浩繁停茲盛舉但愚意欲三先生同祠並祀而廣平書院創毀無徵聽舒氏子孫自立家廟如慈谿楊氏故事庶公私不至混襲仍再議報以憑轉詳去後今據呈覆前來看得該府又查有鄞縣袁正獻公委與同門共學相應一體崇祀該府所議祠宇規制一應經畫區處事宜似爲允當合無行令如議施行

議遂昌縣訓導張秉齡病故申

看得訓導張秉齡到任未久遽爾病故委果貧難無力歸葬情固可憫於例亦相應賙濟合行該縣照例

起關仍動支無礙官銀量給水手二名以資路費

議龍泉縣訓導袁懋病故申

看得龍泉縣儒學訓導袁懋病故委果貧難無力歸  
葬該縣欲遵照本院批允分守道呈詳查律例請定  
裁以處故官事體給與水手二名切惟儒官寒苦旅  
櫬難歸委宜從厚優恤合無依擬給與水手二名仍  
照例起關應付

議台州府賀時雍告衣巾奉祀詞

查得賀銀由洪武庚午舉人歷桃源教諭宛平知縣  
永樂初年靖難師南征銀爲守城陞工部右侍郎尋

降本部主事復陞通政據其一時似亦有協助之功  
當卽超遷美官今又建祠特祀已足報稱若要之至  
理不無遺議比之陳恭愍公闡明理學有功名教者  
寔是不同况賀時雍雖係銀之後人而習染市井寔  
與房杜子孫無異豈得假以奉祀爲由希圖冒竊衣  
巾揆情協義寔難准與且今浙江游民動輒影射告  
討衣巾鼓扇成風漸不可長所據本院批詞擬合繳  
覆

議金華府民盧子通告祖都御史盧睿入鄉賢  
祠詞



查得宋儒黃灝云鄉賢不以功烈不以名位非能明  
孔孟之學者不祀非能篤君臣父子長幼夫婦朋友  
之倫者不祀非有正心誠意慎獨之功者不祀是蓋  
本以崇道尚德列之先聖宮牆之下以爲後學矜式  
之地寔爲重典關係匪輕今盧子通所告伊故祖原  
任都御史盧睿平生爲宦政蹟俱在彼中莫語支詞  
無所憑據果如其言亦於祭義不協况盧睿顯融原  
非孤寒之士浙中巡歷又多采察之賢若果應祀何  
待百三十年之後方有此舉且今理學名臣之錄旣  
不開載本道查訪亦有異議揆之祭法誠有未安

子通雖曲爲故祖夤緣本道不得不爲名義慎重所  
據本院批詞擬合繳覆

議紹興府訓導俞文入鄉賢祠呈

爲照前事已該前提學副使劉 核實案行停止本  
祖卷案具存該府遷延不覆亦因公論難掩鄉賢關  
係風化重典誠不當以子孫貴顯芘覆其祖父所據  
本院批呈擬合繳覆

覆巡按考教官牌

爲照敎職雖卑旣爲考官亦有以人事 君之責爲  
師弗臣之義若應聘之時先自執卷聽考則是好爲

人師甘心僕僕所以先年各處有志教官往往耻預  
本道官叨督學職在明倫固不敢不以禮處人亦不  
欲人自卑求薦舊年巡歷各府將教官循例考校文  
藝詢訪志行蓋已默定考官庶於體貌不失惟寧紹  
二府近方巡歷考訪因此回覆本院稍延時日今已  
具備繳覆

覆巡按批鄭朝冒告衣巾詞

看得鄭朝冒認祖宗希圖混告衣巾玷污名器情甚  
可惡除該府問罪發落外所據本院批詞擬合繳覆  
覆巡按批烈女張氏呈

看得張氏守節年方四十於例未及表揚及查生員張臬係節婦親姪屢經捏寫各生姓名呈擾以求獎勵見被各生呈舉到道爲照本婦貞烈固是可嘉但生員假此以圖微利殊失本婦守節初意情委可惡除將張臬行令該府戒飭外所據本院批詞擬合繳覆

覆繳巡按轉行勘合

爲照浙中自來提學衙門俱欽遵勅諭典章祖宗成法一切職掌官守並不得一毫假借歷數人品未有曹嘉前項撥補生員一節并呈詳發落等項俱

未有此不敢變亂但事須加慎除通行所屬儒學外  
擬合繳覆

議金華府建祠崇祀革除諸臣呈

看議得靖難之時革除諸臣各忠所事先後死者不  
下百有餘人而義烏一縣寔居其二戶科給事中龔  
泰當駐兵金川門之時自城投地以死乃慷慨殺身  
者也翰林院侍讀樓璉伴受草詔之命歸語妻子而  
縊乃從容就義者也正宜合祀表揚以激頽俗不當  
偏有舉廢以沒孤忠今據該府所呈因樓氏子孫未  
委有無不蒙告有批狀止及龔泰一人且稱該縣查

無空閑基地一時遽難創處欲將龔公附於縣北原  
建四賢祠內將祠額易爲五賢似亦褒忠節費之意  
但據四賢祠所祀宗忠簡徐文清黃文獻王忠文四  
公徵之郡志原非合祀初忠簡祠在蒲心寺之西文  
獻祠在繡川之濱文清祠無所考見忠文洪武初爲  
翰林待制奉 詔往諭梁王元之遺孽欲屈以威忠  
文慷慨怒罵遂被害繼郡邑欲祀忠文而忠簡文獻  
祠亦湮廢遂同文清合而爲一亦姑從簡便耳竊惟  
數公文章氣節人品卓異固不待論但宗徐黃三公  
生值宋元之衰猶幸得安常處順而卒王龔穰三公

出當 本朝之盛不幸皆遇變犯難而死雖微箕比  
干同謂之仁而激頑起懦則不無少異合無將王忠  
文龔給事樓侍讀特建一祠合祀額名三忠其宗忠  
簡徐文清黃文獻三公仍舊祀於原建祠內額更三  
賢庶情文允協名義各當而觀感者知所興起矣且  
今兩浙俗尚漸不如舊小遇患害輒各推避前項祀  
典誠爲發動人心之要機非徒飾治觀美之文具也  
古人臨干戈而興俎豆正謂此耳況三公以一身而  
擔萬古之綱常諒該府不當以一邑而惜環堵之宮  
室也若欲表其遺廬固是從厚但近來不認梁公者

少甘拜子儀者多必須再當核實且旣爲立祠一時難以並舉遺廬亦似可緩通候呈詳允日行令該府將祠宇基地水石工價逐一估計停當呈報興工

議覆會考告考生儒關

准本司關抄巡按浙江監察御史林案驗轉行後開各道將派定府縣生儒俱於八月初二日各道一齊考試將所取考卷各道仍會同提學道再加校閱分別等第固封送院以憑去取等因備關准此照得紀綱正則天下定師道立則善人多今御史與按察等官乃紀綱之司而提學寔師道所繫若於此一決其



防各侵職掌則天下之事便漫不可收拾故內外憲  
職必互相糾舉而推選提學必專 勅責成我 國  
家具有成憲臨照孔赫中間亦或有一二提學患得  
患失志圖瓦全以致巡按御史往往侵越以張威福  
以啓營求上辱 君命下愧師模莫此爲甚是既不  
知守道守官之義又安望有成已成物之功本道平  
生向往今日遭逢寔不敢自負到任二年矢心盡力  
期以正文體抑奔競庶幾少端士習見在應試生儒  
兩經考校自謂無遺若論奔競之徒雖盡監收豈能  
厭足况儒士除取應試外稍知文義者俱已送學肄

業今四方輳集既無府縣文移可憑又無鄉都冊籍  
可據中間多係行止不端曾經問革黜退生員若收  
錄此輩甚非 朝廷設科取士之意豈得爲鼓舞作  
興之端即今見奉禮部題准 欽依不許將生儒濫  
取入場此其至意尤宜遵奉何忍妄開奔競之門顯  
闢黃緣之路前項會同考試將卷送院以憑去取等  
項不敢預聞爲此備由移關回覆煩爲查照轉達施  
行

批紹興府蕭靜菴先生入鄉賢祠呈

蕭靜菴先生剛明之資真實之學稽古訂今再聞吾

道勸善懲惡一正士趨此真前輩之冠冕後學之典  
刑也南畿久列名宦少慰斯文東浙尚虛鄉賢誠爲  
缺典該府留心治理加意化原廣延士論博采鄉評  
致有茲呈足稱盛舉依擬卜日造主送入鄉賢祠祀  
以昭前哲以勵後人

批紹興府汪提學入鄉賢祠呈

汪學憲學行素著士論僉同足以風勵後人仰府立  
主以禮道入該縣鄉賢祠祀

批金華府章尚書唐同知入鄉賢祠呈

章司空准送入鄉賢祠唐常州姑俟論定

批平陽縣改建儒學申

近日當事者於各處故舊顯要坊牌則動捐贓罰銀兩以全省計之所費不貲至於申脩學校則嚴爲阻遏乃有先師無廟明倫無堂者是誠何心哉該縣此舉足見畱心治本經理化原俱依擬施行

批慶元縣脩建儒學官舍申

有司政務教化爲先學官雖卑師道所係今據教諭吳瑞所申乃至棲身無所投止僧房爲提調官者諒亦難乎爲情矣近來財匱民貧苦於冗費其他可節省處甚多此則似不可已者既有廢寺間屋仰縣量

爲改造方見作興但不許因而擾民

批紹興府學教授梁以蘅侍養申

古人一日養不以三公換梁教授念伊二親遠在千里此其至情豈一官可奪但念本官選貢中式平生辛苦未遂顯揚雅志清脩足爲師表仰府提調官慰留供職以需推用

批錢塘縣生員馬千里承重申

禮喪服小記祖父卒而爲祖母後者三年據申馬千里庶祖母王氏寔生馬相馬楫而千里則相之子也相旣先王氏而死今王氏死而馬楫若長於相則千

里有辭矣今相兄而揖第則揖固服揖之服耳於千里無預今之律令酌古準今已明言嫡孫爲祖後者服斬衰三年餘雖不載意義曉然禮有等殺時宜假若爲祖後者偶無嫡孫則祖之喪服將遂已乎諸侯大夫之服每殺於士庶而宗法則固嚴於士庶者也魯哀諸侯爲妾齊衰固爲非禮其子悼公爲母服喪則無不可古者妾祖姑得祔于廟諸侯大夫且然況士庶乎王氏固千里之父之所自出也千里承重執喪緣情協義明禮正法自不當以嫡庶論矣又何背宗之有親喪固所自盡君子寧過於厚仰縣行學着

令千里照例守制

批諸暨縣生員鄭選等承重申

據前所申只爲鄭選鄭逢承重未定着令再詳今又  
增出鄭迪是專爲承繼而設世道不古人心日趨良  
可慨嘆見行事例昭穆應繼者不賢許立族屬親愛  
之人亦原無愛繼名色楊承惠等若吐露真情息其  
爭端是亦誠心直道顧乃支吾調文侮玩典禮假公  
濟私以義飾利將誰欺乎此等生員學識心術俱可  
知已覆相之圖爲人後者不入承繼之事非本道之  
所願預聞也鄭選依擬承重

批桐鄉縣生員馬霄起復申

喪具稱家有無則斂形還葬斯謂之禮馬霄因貧而  
久露親喪恐非仁人孝子之所忍爲豈將以郭元振  
范堯夫望人耶該縣旣不能助葬乃又轉爲申詳以  
致本道於情法之間寔難爲處及查本生在學三十  
二年罔知自奮累考下等青衣發社旣不能顯親揚  
名又不能養生送死固天地間之罪人名教中之棄  
物也其流落困窮皆其自取耳何足恤哉姑依擬發  
落紙贖饒免仍候另案施行

批紹興府學生員秦倪等詞



保留官員本非生員之事但在弟子留師猶或有可  
原耳四六可作表啓世俗相沿用爲呈詞稟帖亦非  
體式況此語涉鄙俚反欠懇切而繞樹三匝乃曹子  
有感之言若用於此則是梁教授本欲求仕而故爲  
乞休無乃昧其高尚之志乎仰府行學省諭是亦教  
誨之一端也梁教授仍留供職已別有批示

批安吉州學生員趙鎡等修學詞

據呈及訪諸鄉士夫該州學校委係荒蕪聖賢無以  
妥靈師生難以肄業值今治教休明之日豈宜有此  
近來冗費可節省者甚多此則不可已者王松齡等

既欠折色學糧又有歲考餘銀足可經營仰州掌印官即便嚴追脩理務在刻期落成但不許因而科派擾民

批開化縣學田申

據申江有誠自願捐產以爲學田誠爲義舉但中間情節仰縣再查明白具丘段坐落租數置簿印蓋發學務爲經久可憑之計其田上稅糧并一應掌管俱要處置得宜

批餘杭縣學田申

據申足見該縣士民向義以興學校但須務實可垂

永久斯爲得之仰縣卽將所輸學田坐落丘段四止并佃人姓名租額數目驗實造冊

批嘉善縣學田申

張文等佃種學田租米數目依擬每年徵收集貯以資貧生但掌管出入俱要籍記明白

批金華府育女申

潘九思家貧而育五女此固天理在人心不容澌滅但人多溺女而彼獨不忍委當獎勵以激薄俗仰縣查取本道無礙紙價買辦羊酒果品送至本家以示優異仍免雜泛差徭所告衣巾干係制服難以准與

批嵯縣生員王良翰起貢申

未經科舉生員例不許貢王良翰因見縣無正官謀求該學教官妄呈該縣申擾紊亂成規其無行檢可知仰府即將王良翰截日停廩候歲考定奪該縣官吏亦候按臨寃實另行仍通行各屬師生恪守成規遵依案驗勿得因起貢一節妄興異念自取罪戾

批海寧衛生員劉學顏優免糧長申

糧長照田編審自是有司職事劉學顏計圖冒免乃囑該衛徑申有紊成規肆無忌憚仰府掌印官寃問并提該吏擬罪詳報

批寧波府綠事生員張南山起復呈

張南山綠事曠學經今九年累次不預歲考况伊父張惟遠通番下海積惡年久不聞張南山諫止抹正顯非邁迹自身難稱不係世類仰府查照巡視衙門原行仍黜退爲民當差行學除名

批衢州府黜退生員姜尚寶呈

姜尚寶若果係真情當時何不告明况前提學雖係陞遷查係該年十二月廿四日方纔離任何直待啓行之明日方赴帶管道告理中間情弊寔難准信且既經案驗黜退豈得擅開告擾之端不准收復

批杭州府緣事生員華識呈

據呈汪廿七之死雖若自取而華識之釁亦似有因  
况飯店下碁生員自宜迴避乃顧投入其人品可知  
該府問擬照舊肄業固是寬待生徒恐亦過於從厚  
仰行學姑將本生革去衣巾着令省過候按臨送考  
定奪

批衢州府問軍生員張廷秋呈

張廷秋既經察院詳允固難再問但伊弟張正聞毆  
人命服罪抵死廷秋告稱並不知情固未委虛的只  
是以鐵尺助打恐生員之家未便有此器具以是而

坐以前罪則是以一朝之忿而第絞兄軍或有冤抑亦本道所當預聞者也故一批行耳仰候恤刑衙門審日具由

批處州府呈任元芳等招

據招審得任元芳打傷任元禱右目合坐應得罪名但一時乘醉逞兇變起倉卒任元輔豈能預料至此遂得勸解擬以不應殊非原情之法任元芳自知不合毆傷大功寫與田祖作爲醫藥之費亦不當變價入官通該饒免其餘依擬取實收

批湖州府邵康山入鄉賢祠呈

邵康山立心制行上追古人本道所知依擬送入鄉  
賢祠祀以勵末俗但該學生員所呈如不隱年之類  
此則稍知自好者所不爲以是而稱康山則反有以  
掩其美矣況動爲四六牽強可厭今後如有建明只  
須據事直書務在崇雅尚實不必爲此以蹈鄙俚之  
習且所引湛王以對濂洛亦覺不倫王是陽明先生  
固宜推尚湛不知何人昔陳瓘生長東南不識伯淳  
本道南輔鄙人寔不敢強所未知也諸如此類仍行  
學慎重

批紹興府湯知府入名宦祠呈



湯紹興德政去思委出於民心士論之公該府所呈  
與本道采訪相同依擬送入名宦祠祀以彰崇報之  
典

批紹興府呈劉檀等招

劉檀起滅詞訟屢犯不悛衆所素知今倚老爲奸犯  
罪收贖情甚可惡其子劉燧不能勸父爲善已非爭  
子乃又商議興詞可謂世濟其惡矣本當黜退但念  
進學未久姑從寬革去衣巾發社省過不許應試餘  
俱依擬發落

批紹興府呈馮恕九十八等招

看得馮溥原置生員膳田本有激勵子孫讀書之意  
馮卿因與馮麟有師生之分將所置田產獨與馮麟  
收管此意亦是但麟子九十八久假不歸認爲已有  
以致爭訟甚非伊祖置產初意該府招詳姑依擬發  
落仍行戒飭

批宣平縣脩射圃呈

禮制所在關係世風古人所以臨干戈而興俎豆也  
該縣欲建射圃却又中止乃稱再候缺官齋膳此廢  
閣之說矣仰府仍行審處如何

批青田縣知縣鄭黎申

據由原無台鼎之望重益丘園之想此本道素志豈得不推已及人但本官學優年壯從容歲月以驗體用之學亦無不可縱有旦夕之恙善爲調理想可卽愈其諸世情俗態稍有憑籍便爲凌轢只合視之如狂風浮靄何足介意若十分難堪則固不當強也

批寧波府楊知府入名宦祠呈

楊公寧波之政邁古循良而究其人品則又豈特一方之名宦而已該府久未奉祀誠爲缺典卽造主送入名宦祠內以爲世訓

批鄞縣申

鄉賢名宦崇德報功官職崇卑何足論哉以府官而不祀縣令此真穆禋等之陋見正不知官階遞遷倏有更易非若君臣父子一定而不可易者况前日之縣令既崇祀名宦則與後日之府官原無統屬施之者何得爲過禮受之者何得爲未安乎况祭不欲數附府之縣自來合祭庶不煩瀆仰縣只湏仍舊

批杭州府脩理文廟呈

近來坊牌水手之類動費不貲一呈脩學則嚴詞阻遏浙中各處甚至有聖廟無以妥靈師生無以居業者矣該府職在提調自宜見義勇爲人心各有天理

亦何必以損名爲慮哉或有堪動賊贖或應便宜措置仰卽施行

批嘉善縣減免朱鵠等學租申

士民一體均宜體悉該縣此舉正所謂平其政也依擬施行

批處州府呈杜九經等招

看得施炫告杜九經陰謀奪娶則九經之罪難從末減若旣涉虛則加誣之罪合當反坐况二人俱叨胃監人數尤宜遵照教規今據招情一則娶妻而配失節一則告狀而索聘財雖市井不屑豈士類所爲該

府行縣覆審叅詞乃謂於禮法無妨於彝倫無黷舞  
文至此其尚知有禮法彝倫乎况聞通學生員曾呈  
該縣不知作何究竟仰府并提生員李繼康審實招  
詳

批慈谿縣王都御史孫府尹入鄉賢祠申

王節齋孫毅庵二公人品本道素知依擬送入鄉賢  
祠祀

批慈谿縣陳文定公立祠申

陳文定公係理學名儒依擬立祠專祀以風後學其  
陳志學查果係文定嫡孫亦准衣巾守祠

批杭州府海寧縣 建二顏祠呈

顏魯公係瑯琊人氏其節義暉映宇宙不必稽之載籍亦人所共知但該縣據陸應龍所呈謂其始祖顏昌屬籍海寧而前朝曾爲二顏建祠並不開何代何年俱無憑據若漫爲立祠雖若從厚實則矯誣昔郭崇韜拜子儀之墓君子耻之顏樞無乃蹈是乎該府考究詳明且謂子孫遼遠難查若欲一槩優免則似是亂真徇名失實可謂洞見其僞美仰行令顏樞毋興妄念戒飭陸應龍不當草率扶同以致煩擾案牘

批温州府呈陳繼野等招

陳惠無子鄔氏卽當爲夫立嗣陳繼野等係陳惠親  
兄所生次子本係應立之人若本婦不與相得自該  
照例於宗族倫序相當之人擇立賢能及所親愛者  
孫雲係本婦前夫之子與陳惠無干只宜聽其相爲  
依倚豈容霸占不爲陳惠立後乎若惠所貽田畝養  
贍鄔氏終身聽陳繼野等兄弟分管則陳惠終於絕  
嗣矣一物不得其所吾人所當軫念者仰府再處詳  
報

批瑞安縣揭帖

該縣正官雅知治本敦尚化原因于戈而興俎豆之



思此其意義豈近時專事簿書期會者可同日語哉  
敬服敬服但所據欲刻卓公遺文更須博訪文獻之  
家或者耆儒故老縱不能得其全稿庶幾再得數篇方  
可成集雖大庖一臠亦自知味然亦不當使有遺也  
遜志齋集亦是後人用意搜羅始得成帙留意留意  
若序文一節本道固欲附名者統俟從容爲之

批台州府呈張鎰等招

張鎰等父子兄弟以祖父教官所遺財產連年構訟  
此固近來薄俗無足深責但其間有監生生員亦宜  
稍知義利重輕何忍爲此該府旣審處停當俱依擬

仍將監生張釗生員張垣等重示戒飭發落

批上虞縣生員錢仁喪制申

錢仁既係王氏所生自當查照律圖守制豈得謂嫡母老父俱在制雖有礙情實不忍俯順憂制斯言甚可疑也仰縣行學今後生員務遵禮法勿得爲不情疑似之言希圖誑惑自取罪戾

方山先生全集卷之五十

公移四

延綏兵政

行延安府慎刑獄案

照得刑以防民所以禁暴止邪欲使惡者知懼善者  
獲安本不得已而設故罪疑惟輕刑故無小然後刑  
得其平而人知法守斯畏而不敢犯也近見按屬地  
方慶陽頗覺民淳訟簡惟延安所屬盜賊滋起獄訟  
繁興本道每一叅詳盜賊雖若有影而攀扯牽連多  
無贓仗人命各執一詞而致死根因多不究驗及駁  
問行令解審多淹禁不理往往情罪未明已死牢獄

捏文病故遂作了事又或有不犯十惡重罪止因小  
小詞訟或催徵錢糧亦竟監禁至死絕一問及輒稱  
此處民刁若非重法彼將不畏視小民爲仇讐輕人  
命如草菅及至地方棍徒衙門積惡一切生事害人  
怙終不悛者雖被告發則輒從末減爲民父母是誠  
何心本道叨領軍民重寄若亦因循度日不顧民瘼  
則鰥官曠職莫此爲甚合行戒諭爲此案仰本府當  
該官吏卽行府佐貳并所屬州縣及衛所掌印巡捕  
等官各宜盡職守法慎重刑獄不許姑息以干譽怙  
勢以立威其於人命強盜十惡重情必須根究分明

証據的確查照律例擬議隨即申呈定奪其一應尋  
常詞訟亦要詳審所犯輕重原情定罪早爲發落催  
徵錢糧酌量緩急定限比併不得一槩恣行酷暴仍  
行各屬官員將律內故禁故勘淹禁凌虐等項斷獄  
條例各寫一通粘置座右常自警省如再故違或查  
訪得出或被入告發定遵照叅問決不輕貸

### 行各屬招撫流賊告示

據各府州縣申呈強犯招由內開盜賊多有分米二  
三斗布一二疋舊衣二三件驢騾牛羊二三頭隻者  
俱係各執兇器打劫依律擬斬本道叅詳此輩皆係

窮民愚昧無知本欲偷生反致速死情雖可憐法不容貸今特爲汝求生亦尚有路照得強竊盜自首者律開免罪其親屬首出者例減一等爲此出給告示曉諭知悉作速赴道投首給帖各歸生理仍量免差役如有情願投軍效力邊防者亦爲轉呈收伍一體食糧操練若執迷不返仍前嘯聚山谷卽出兵勦捕梟斬悉殲黨類其勿悔

行按屬禁革奸民告示

訪得各屬街市豪強并棍徒喇唬人等通同衙門人役專一欺侮鄉民或攬納稅糧勒文加贈或包攬差

役冒開使用或逼徵私債舊逋或把持買賣交易百般刁難不可枚舉致使鄉民不敢入城甚至下鄉需索迫民逃竄除以前姑不查究今後敢有仍前縱惡不改過自新者或被人告發定行照例問罪決不輕貸

行各屬預處腹裏地方告示

古者選將練兵不拘名籍廣開條格不拘一科或以智或以力或以騎或以射或以健步或以口才或以推占或以技巧某可爲今日之兵某可爲他日之將隨才器使皆可委任各該軍民雜流人等凡有前項

一長者悉聽赴本道及各府衛州縣衙門報名以憑  
揀選呈報施行

行延安府審編均徭案

照得邊方之政以防虜爲先防虜之要以撫民爲本  
民心渙散將誰與守本道巡歷延慶二府唯延安所  
屬州縣之民逃亡將半其有存者動輒扶老移幼告  
稱差役不平雖民俗或有未淳吾輩不當逆詐本道  
以撫民備兵爲職寔切負愧所願賢守令協恭和衷  
共恤民隱爲此案仰本府官吏卽行所屬州縣查照  
明例嚴督所屬州縣掌印官責限里書各將本甲人



戶攢造花名手冊開報丁糧實數其逃亡老弱疾病  
應該恤免者亦令明白開寫從公面審查照歲額差  
使於該年均徭人戶丁糧有力之家儘數止編本等  
差役不許分外加增餘剩銀兩貧難下戶并逃亡老  
幼殘疾者聽其空間勿得一槩編派亦不許額外濫  
設聽差等項名色所謂寬一分則民受一分之賜也  
如此則斯民庶幾有生全之望無事則爲比閭族黨  
之民有事則爲伍兩軍師之衆虜雖卒至而衆心旣  
固各保室廬將自有防禦之術矣本道迂腐不諳治  
體亦不敢徒事虛文以美觀聽一得之愚唯望相信

毋忽

行延安府清查刑獄案

照得按屬軍民率多罔法健訟或嚇騙財物而誣告平人或小事忿爭而牽連人衆奸詐百出難以枚舉及至拘提到官又不即與問結以致無辜久禁妨廢生業況今時值炎熱易致疾疫本道按臨清澗縣查得監禁數多已行省發除官吏另行外合行屬一體清查爲此案仰本府當該官吏照案事理即行所屬州縣衛所各將見監一應罪犯逐起清查除重犯外其餘充軍徒犯作速追處完贓如贓銀不及十兩監

追年久委係貧難無措者照例申呈饒免贓銀各依  
原擬發遣發配應勘問者即便問結其犯該笞杖者  
卽時發落釋放不許一槩淹禁仍令各將奉到案驗  
日期并審放過起數姓名各徑申呈本道以憑施行  
行按屬安民告示

說與你百姓們知會卽今歲時荒歉你各處百姓窮  
的沒有過活只圖升斗粟米幾件舊衣服却就打夥  
做賊一拿到官只得依法問罪多死牢獄着甚來由  
我爲你計較自有一條活路今奉延綏巡撫都御史  
王案驗內開安邊鎮羗千戶所一帶空肥田地數多

有願投軍者每名給地一頃永不起科做你常業編  
發附近操守我又恐你妻小隨帶一時無處下落又  
申呈你王爺許先給口糧蓋造營房安插你若肯自  
出投首便是積年歇案亦都饒你罪名不拘各省各  
府州縣人就與你文書解送你去既有田種又有屋  
住目下且先得口糧你一家老小都得完全却不是  
好投軍之後若有功勞又得陞賞你們可早早思量  
上緊自行投首幹此營生你若再不省悞却是自尋  
死路縱有愛民的官府亦無柰你何了我前日已有  
告示你們又不曉得文理故又特此示知

行延安府賑濟牌

照得饑民嗷嗷本道已行令各屬速即賑濟去後除慶陽遵行開報外今本道經過延安地方老幼數千遮路哀告咸稱官吏留難延安倉粟尚有三萬緣何遲滯除該吏另行外爲此牌仰延安府知府速即賑濟毋致釀成他變牌具不違依准繳

議旱災呈

爲照延慶二府旱災不獨據各呈報本道巡歷地方親見山田枯槁窮民情狀更有不忍言者相應呈請合無候詳允示行令該府通行各該州縣掌印官除

防秋事宜外各將不急事務暫緩徵科被災窮民加意撫恤一面委官分投踏勘災傷并應徵免地糧分數造冊呈報以安民心

議撫按送發延安府地方災傷呈

照得勸借一節已該布政司議得閭里蕭條民間積糧亦少先年勸借至逼傷人命似難再行俱切實之見既經該司議呈本院詳允無容別議近據延安府呈將府屬被災鄜綏二州膚施等八縣并延安衛各預備倉并官庫見在銀穀應賑丁口各數目及應行事宜文冊到道看得冊內所開饑民止據先年均徭

文冊大約而設州宜川等九州縣尚未查勘以致吳堡等縣旋又赴道申告誠恐預備倉糧贓罰銀兩亦止據舊管未盡明悉有碍施行切思救賑災傷須官有實政斯民沾實惠查筭丁糧須核有的數斯臨時無悞本道不敢應文取具一面行查各州縣饑民實數一面委官親詣該府各州縣將相應備賑錢糧務查的數伏乞本院批委本官務要用心盡法庶錢糧易清而賑濟無悞矣

議久缺俸廩懇乞急救以全生命呈

照得預備倉糧所以賑荒師生俸廩所以勸士各有

常制不相移易該府欲將倉穀止給教官一月其餘生員盡行從緩不爲無見但據常而言士民固有分限通變而處饑荒皆宜賑恤該學設在邊方十分寒苦教官帶有家口經年缺俸稱貸度日告急之情誠不得已若止給一月則償逋猶且不足其實無以聊生及據鄜州中部宜君洛川等學師生亦往往赴道哀告均爲可憫合無將該府州縣預備倉穀依擬該府折筭每俸米一石折給穀一石五斗將教官缺俸月分儘數補給其缺廩生員查係貧難者亦量處濟急待徵完學糧照數除還預備倉內賑荒



復撫按迭發延安府急請兵馬設處火器議

爲照軍機重務而當事者惟恐違悞以速法人品不同而多欲者動輒假借以濟私故防秋二字名號甚大一有建議莫敢可否其諸胥史聽委人員則又往往乘之以恐動上下激論危言大率罔利法愈立而弊愈滋財日匱而民日困未及衛民先已擾民故小民有情愿被虜不願防秋之謠良由當官者不能以省事爲本也若使虜人一至果與交鋒廝殺則雖歲捐萬金以置軍器固不當惜但今城堡山寨止以收歛爲尚况保甲鄉夫人等本各自有軍器比之工部

置造給與邊兵者例原不同且又兵部咨文明開居  
民火器鎗刀令其自置則衆輕易舉不但惜財寔亦  
物各有主易爲管理也若使民心堅固則雖斬木揭  
竿執鋤制挺亦可以捷利兵堅甲古今明驗誠非迂  
言今該府必欲置造軍器亦是慎重防秋深慮但州  
縣庫貯贓罰見因年荒議賑猶恐不敷寔難支動里  
甲見多逃流亦不當又行派處本道卷查該府領過  
防秋錢糧自嘉靖二十九年至三十三年共銀三萬  
九千七十兩本年七月至八月又領過銀二萬五千  
兩部銀原有滴補內外秤法重輕亦微有不同銀

既多支放之際羨餘積出難說盡無及該府州縣自理贓罰亦未必盡行呈報合無聽其支取置造一半但軍器給散民間頗難收拾而棄毀之律罪至坐斬將來官吏人品不齊假此查理挾嚇適貽小民無窮之害似應行令該府將置造件數自行收貯遇民有缺乏願領用者聽其臨時給散事畢納還縱有停留罪亦稍減庶爲民便

行延安府預處防秋兵馬糧餉案

照得來年防秋兵馬合用糧餉已經案行延安府查照舊規酌量地方衝僻預發官銀赴時糴買去後但

該府自嘉靖二十九年至本年領過官銀數多似應  
必有存剩本道奉延綏撫院案驗行查節催不報且  
又廢棄舊規自嘉靖三十三年以後分發防秋銀兩  
數目及防秋畢日支剩數目並不呈報卽今該府各  
屬存剩原發銀兩若干糧草若干未委穀否來年支  
用合再查明爲此牌仰本府當該官吏行掌印張知  
府查照先今節次牌案事理卽將嘉靖二十九年至  
本年支用存剩防秋銀兩總撤數目作急造冊開報  
其穀否來年防秋支用俱要逐一明白聲說以憑轉  
詳預處施行此關係軍機邊防法例重大務要戒飭

承行該吏人等各深思猛省勿得仍前含糊不遵舊  
規致於本道無一字呈報及再帖發各屬紛紛申擾  
希圖延捱歲月遮掩前非致悞大事牌先具不違依  
准繳

給發招撫流民執照

據某府某州縣民某人告稱先年因貧在逃今蒙招  
撫復業等因告投到道合行給帖付本告執照回籍  
復業仰各該府州縣官將本告舊欠糧差悉從停緩  
一應私債俱暫與饒免不許追徵如有里書人等及  
勢豪債主指以前項逼擾者就執帖赴該管衙門稟

告提問招詳如本管官故縱容隱許赴本道陳告倘有奸猾得過軍民捏作逃移復業希圖冒免差徭者該管衙門審出亦卽問招并追此帖粘繳以憑重究

復撫按賑饑征糧議

切照賑饑無奇策征科無善政自古已然卽今被災州縣官員大率緩於議賑急於征科其間固有以軍儲爲虞恐貽將來之責亦不無以常例注念希遂雖刀之私但征糧一動則差人旁午敲朴誼囂饑民驚疑無望賑恤相率逃亡縱諭不止合無暫停時日姑候奏請荒本至日立限催徵或先定分數不得一

槩追併庶幾窮困安心可免他變再照小民所苦者  
里甲則州縣日取供應驛傳則公差多索折乾徭役  
不論丁之多寡率賣富而差貧賦稅不計田之肥瘠  
慣以荒而作熟監倉舖舍多繫無罪之平人門皂走  
卒常用積年之民害應捕諸役往往縱真盜而誣指  
良民義省等官在在假虛聲而嚇詐小戶凡此虐害  
甚於災傷雖曾經禁諭而有司奉行不一仍乞申明  
着實遵行毋徒以虛文搪塞則驅民之害便是因民  
之利雖未家給穀粟而民自有更生之望其於荒政  
不爲無補矣

復總制巡撫二院游兵錢糧議

照得延安夾於大山長谷間不但虜衝寔爲盜藪故  
洪武二年一設府治即置衛所固禦外虜亦防內盜  
成法所在本不當變動正德九年洛川妖賊李五爲  
亂特設兵備副使一員住劄鄜州議調西安潼關官  
軍防守其行伍名稱則仍隸該衛近年延安新設遊  
兵一營因兵數不足將鄜州下班官軍同該營防秋  
一時權宜似無不可但將延安衛軍五百二十名選  
入該營其本色屯糧雖仍在該衛關支而增加折色  
則在京運游兵營內放給不惟名稱混淆將紊亂尺



籍而錢糧交互寔以啓後來影射之弊合無將游兵  
營錢糧止給營軍其延安衛軍五百二十名仍隸該  
衛若用以防邊就在防秋錢糧數內照依客兵行糧  
支給待後營軍收補足數則營自爲營衛自爲衛則  
成法旣不變動而錢糧亦易稽查冗食不無少省而  
奸欺之弊可杜矣

批延安府急請兵馬設處火器呈

該府原編防秋并額設民壯各有數目并節年各屬  
置造軍器就不如法亦不應漫無稽考仰作速查明  
逐一開具呈報以憑酌量施行勿得一槩混呈設處

以致滋擾貧民此最掌印官所當留意者也

叅巡捕指揮徐銳呈

奉巡撫唐批據延安衛巡捕指揮使徐銳呈稱拿賊苦勞前病舉發呈乞更替等因通呈照詳奉批仰分巡河西道查報又奉延綏巡撫王批仰分巡河西道查報又蒙巡按浦批分巡河西道查報蒙此卷查先據延安府招呈強犯董時貴打劫甘泉縣劉萬教家財比劉萬教具告徐銳處徐銳不行呈報上司妄拿平人楊景雲尚錫發鎮撫司監候楊景雲病故將尚錫徑自釋放又縱董時貴妄攀楊倉李有劉義秦朝

向川兒呼廷章等一千平人徑自淹禁唬嚇挾詐心  
迹較然該府因係軍職姑從末減叅呈本道轉呈本  
院蒙批徐銳革去管事量罰雜糧二十石依蒙於本  
年六月十四日革任發延安府追納贖罪其巡捕事  
務已蒙延綏巡撫王行委指揮神漢管理已久徐銳  
正宜悔罪歛戢乃復哄誘衛所軍士朦朧於七月以  
後妄叙辛苦自稱告閒通行呈擾希圖不行查理以  
遂欺蔽此雖武人不當責備但其公行恣肆侮玩上  
司一無忌憚情甚可惡合乞批示戒飭嚴追原罰雜  
糧以警將來

參虜人入境殺傷官軍呈

參照高家堡守備綏德衛指揮使劉芳猥以庸懦之資濫膺守備之任平時怠事而烽報不明倉卒被圍而收歛無策勢雖不敵責實難辭本堡坐堡榆林衛右所實授百戶陳勛罪屬同科法應併究協守延綏副總兵陳鳳延綏遊擊將軍署都指揮僉事孫邦詹恩左珊雖若及時應援不能相機斬獲幸而堵回大虜罪亦有間遊擊楊璘遠自京歸適值虜犯兵屬億弱情可矜原鎮西將軍鎮守延綏地方總兵官左軍都督府署都督僉事李輔職專分閫手握重兵平時

實欠豫謀臨事僅能調遣罪固有差例應併論若百戶鄧淮等奮勇搗巢建安坐堡百戶李時梁赴難保陣均屬有功似難泯沒緣劉芳陳勛俱軍職李輔係在京堂上官陳鳳孫邦詹恩左珊俱將官擬合一併  
奏呈

批宜君縣強賊入境申

據招申畢守倉所犯係干強盜重獄但賊伏在伊家搜麥貳斗其王廷西所失器物數多未獲一件似欠明允有礙轉詳仰州解道覆審施行

批中部縣竊盜拒捕傷人申

方山全集卷五  
高行盜田野粟穀事主追捕逃走不脫以致拒敵遽  
擬斬罪似欠明允有礙轉詳仰速將事內人犯解道  
覆審

批中部縣犯人韋鸞申

韋鸞監禁日久家屬節次稱冤告貧賊無處辦據招  
原坐贓銀止是二錢五分并紙一分既監追年久照  
例饒免查依原擬發翟道驛擺站照限滿放

批延安府預處糧草以防虜患呈

據該府呈文錢糧誠是缺少奉延綏撫院案驗開具  
則發過錢糧已多未見支放的數本道見行該府清

查未報今防秋期近恐待查明之日緩不及事已將  
呈內事理轉詳總督軍門延綏撫院候批示另行外  
其清查一節關係不小宜上緊查照原行刻期回報  
批延安府乞將馬景隆等告詞分發各衙門查

寃呈

據審招呈漫無着落馬景隆告詞撫院原批該府其  
李述儒妄申情節前道亦行府併究經今年久若再  
分發各衙門則淹累小民牽連州縣終難歸結此必  
承行吏劉仁推奸也況呈內事情亦無大關係仰將  
供明犯人馬氏省發外該府查吊原行作速問報以

憑衆詳施行

批延安府呈犯人薛遇遲

薛遇遲薛彥叙所犯俱依擬但原蒙前察院有行除候轉詳另示外仰府仍查本道原行案驗其薛遇遲一起糧犯尚多如何朦朧仰作速逐一嚴提問報今後雖各人另招其呈文前後亦湏明開如云除某人未到另行外庶便稽查

批延安府偷盜軍器呈

據原盜盛二頂未獲本道批行該管官名下追陪者正欲嚴典守之責以警怠忽若又未追遽呈照驗恐



遂致湮沒何以示懲仰府卽查該管官追陪况鮑王馬僧保俱係軍人乃食糧差操人數必有行伍可稽何得遽稱逃亡亦須併究下落

批延安府給由吏姜時會申

姜時會役內既經管錢糧未據開報數目明白難稱無礙仰府再查呈奪今後起送吏役凡完過事件錢糧等項不必本道發票駁查各就明白開款同由結粘連呈詳查考庶省煩文往復

復延綏西路議建邊方學校關

爲照文德誕敷有苗來格泮宮旣作淮夷獻琛自昔

學校之興寔寓威懷之道矧茲關陝歷有明徵嘗觀  
李泰伯有言曰秦併六國都關中天下莫強焉劉氏  
一呼而武夫健卒賣降恐後由學校之道廢人惟見  
利而不見義也漢光武奮起戎行孳孳學術雖至季  
世羣雄相視聞命釋兵者由教導之結人心也雖古  
今之時或有不同而人心之理則寔無二今榆林鎮  
自黃甫川歷定邊營千五百里有奇城堡三十四處  
止建榆林神木二學教養之法誠爲踈闊且係關陝  
襟喉將卒觀法之地所據於靖邊營添設一所建立  
學校以便生儒講習一節誠脩文振武之規經世慮

遠之策合行回覆

行各屬防秋告示

示諭各城堡驛遞市鎮村集等處承委收歛員役人等各務謹慎小心聽候傳報無致悞事不許以防秋爲名設計造端乘機科索小民粟物酒食其窩寨可守去處亦遵照原頒條約聽民自便不得刁難抑勒敢有犯者重治不貸

行延安府查理發過防秋糧銀牌

卷查嘉靖三十二年以前延安府收貯防秋糧銀開呈本道定發各州縣糴買糧草支用其三十三年以

來該府徑自處發未見呈請彼此不相照應致難稽考此係邊儲錢糧數目既多關係亦大理合行查爲此牌仰本府當該官吏照牌事理卽將該府故違該吏問伊前項錢糧既經本道呈請發府因何支放畧不經由擬以應得罪名薄示懲創以謹將來似不爲過若近年新例該與本道無干亦要明白呈請施行毋得違悞不便

行推官胡溥恤災緩徵牌

照得地方災荒小民窮困已奉撫按衙門議賑其應徵應免糧草已經案行延安府查照遵行去後今訪

得推官胡溥在於府屬州縣催徵糧草拘鎖官吏家屬嚴刑併徵如此凶年民何以堪爲此牌仰本官照牌事理卽將應徵起運糧草限定日期次第勸諭催徵聽民陸續上納毋得一時嚴併逼民逃竄反致錢糧不完凡事須當慎重酌量毋得任情取究

行各府賑濟饑荒酌處城堡案

近因地震本道巡歷親閱城堡多有坍塌本月二十六日又蒙延綏巡撫王火牌准山西大同趙總兵傳報河東大虜要過河西地方搶掠萬一深入城堡俱塌何以防患本道實切憂惶爲此案仰本府當該官

吏照案事理速卽一面徑申城堡道知會一面卽行所屬州縣衛所掌印官各上緊修築其合用錢糧酌量議處通詳因思古人每遇凶年輒發帑藏以興工役旣得以濟民饑又得以了公事其良法美意正今日所當倣而行之願良司牧長貳各悉心經理以救目前之急以貽永久之安仍戒諭丁寧各屬務圖共濟艱難無與異念庶幾所謂應天以實不以文動民以行不以言也不然則卽此案驗亦爲虛文何益於事本道觸目激中布此誠惻宜體亮之

行延安府郝同知清查倉糧案

照得鄜州饑民人等稟稱該州德政坊老人王彥章  
欺蔑官民以致放賑不公除本道審將本犯量責發  
倉監候案行延安府同知郝廷璽親詣鄜州從公審  
賑外及本道親自臨倉眼同本官看驗糧斛委係私  
造四斗小斛雖當將斗級孔仕仁責追官斛放賑但  
該州在官人役久弊得志公然玩法肆無忌憚合行  
查究爲此案仰郝同知作急將賑過饑民穀數冊記  
明白其存剩倉穀逐一將官斛盤量數目取具實收  
通行造冊呈報如有侵欺即將經管員役并王彥章  
查照律例問擬招詳毋得枉縱

行延安府郝同知查理月夫案

本道近自榆林歸鄜州窮民數千餘人攔馬告訴哭聲震野咸稱該州歲派月夫一千名內將一百名作爲甲首皂隸每名除工價外每名日該食費銀二分一年每一名該銀七兩二錢共一千名該銀七千二百兩俱係該州雷知州差陰陽生姜計善袁金唐仕義等押管收放民不堪命告乞裁減等因到道初甚驚疑及查據該州兵房吏尚大寵送到夫簿方知民言不誣爲照各州縣差役除奉均徭規則外一應差使俱合申奉上司明文方可編派就是南北直隸運



河驛路方州大縣使客運船晝夜不絕亦未聞有月  
夫至千名者邠州在陝西所屬止通榆林一鎮本省  
官員歲月往來可以數計就有軍輸公務歲月一二  
三次臨時顧情亦可應辦何乃編夫至多如此顯係  
吏役陰陽生人等欺官剥民恬不爲怪以致州民逃  
竄流離幾於十室九空卽遭荒年變且不測合行查  
理爲此案仰延安府同知郝廷璽親詣邠州行提該  
吏并管夫人役逐一查問從公議處明白有罪員役  
卽便依律議擬具招詳報以憑施行

行延安府郝同知審編均徭案

查照發到均徭規則條款審編去後節據該州人民告稱差徭不均見係歲荒民窮恐人心不堪致惹他虞合行改委官再審爲此案仰本官照案事理卽便親詣鄜州吊取知州雷世榮審過冊簿并原發均徭規則從公拘集里老人戶另行查照徭役人丁審定數目酌量編派事完依式造冊繳報本道覆閱如果宜民羣情悅服本道定遵照原行呈請旌獎本官務要體悉另委至情毋避嫌怨

行郝同知查賑地方災傷案

照得鄜州知州雷世榮不行審賑以致饑民成羣哀

告恐致意外之虞合行改委官審賑爲此案仰本官  
照案事理即便親詣鄜州速將饑民酌量倉庫見在  
應動糧銀多寡從公審賑務使饑民均沾實惠事完  
通將賑過饑民用過錢糧繳報查考以憑轉呈

鄜州查洛川縣預處兵糧事牌

據洛川縣申稱知縣楊勗省借過富民米豆草束到  
道卷查先據延安府冊報嘉靖三十三年洛川縣借  
過富民米二千七百石豆五千四百石共該米豆八  
千一百石外草二十八萬束俱係收貯在官呈報之  
數近據該縣民張科告委推官胡溥清查呈報該縣

私貯在街民景信段六等家米五百三十石一斗莞  
豆八百二十七石二斗七升黑豆三百一石六斗六  
升共該米豆止一千六百五十九石八升外草止九  
百六十五束查與該府先報之數多寡不同又且私  
貯民家不收在倉合行查理爲此牌仰本官照牌事  
理即查洛川縣原借富民米豆草束若係兩項則先  
報米豆八千一百石草一十八萬束今收貯何倉若  
係一項因何止有米豆一千六百五十九石八升其  
餘六千四百四十石九斗二升作何下落逐一備查  
明白具由從實開申以憑轉呈施行

行延安府查代判文案押字牌

據延安府賫送六事文冊到道看得年月日係張知府往各處叅謁之時比時推官胡溥署管印事何得有知府僉押批據該府呈稱六事由冊批呈俱係知府押字止空小日推官胡溥僉寫揆之於律已犯同僚代判之條及送蒲吏王賀到道却又仍作知府僉押不惟玩法無忌恐有別項詐僞已經提問該吏郝講未報今照知府回任所據王賀合併發問爲此牌仰本府照牌事理卽行張知府將發去犯吏王賀與同郝講併究明白問擬如律具招呈詳施行

批鄜州查見監庫役王宗禮

凡物成毀相因雖金石亦有鑠泐况驛內鋪陳公差  
員役絡繹蹂踐難保不致破損該州申稱王宗禮所  
管前項鋪陳遺失破損相應盡數賠償本道看得本  
犯監久無追妻子離散而原情揆法與侵欺者不同  
除遺失者限令陪補外其餘破損者悉與饒免查照  
原擬速卽發落不許久淹致傷生命

批慶陽府解審犯人楊應之等呈

審得楊應之沙湖朱克禮等積年棍徒誑官剝民無  
所不至馮五車載引鹽旣納課領票且又不越該府

地方其所經行道路正宜聽從民便楊應之乃挾百戶王守嚇詐將馮五重責以致磕撞身死既委知事于莊檢驗明白如何朦朧發落卽今歲荒民困挑負私鹽正該照例不禁以拯民生豈容楊應之等詐財漫不之省乎梁慶陽乃本道所推信者此招亦覺姑息仰無拘成案虛心逐一研審另招詳奪

行延安府并游兵營案

據游兵營報今秋沿邊山險陡絕去處俱遵依本道原行鑿斷蹊徑覆草爲路虜人疑畏多不敢入可見各坐堡官奉行料理不然則雖有淺謀鄙見亦何能

爲也除候呈詳軍門獎勵外但前項谿徑防邊軍馬未免出入行走乘此燒荒之候合行區處以爲求各之規爲此案仰延安府併游兵營通行延綏一帶自黃甫川至定邊營各州縣官及各城堡把總等官悉心經理凡遇邊牆山岡整臺險隘陡絕處所俱將徑路鑿斷粧砌浮橋以通防邊軍馬行走待防秋之日抽取木梁仍料枯木朽株搭蓋覆草爲路縱使虜人覘知亦足以起其疑畏之心少殺其長驅之勢矣禦虜之策固非一端此亦甚爲緊要況邊地多高山峻嶺此亦天設華夷之限豈宜視爲緩圖各州縣官各



營堡官務在刻期着實舉行本道已赴軍門面議一  
應錢糧俱在防秋項下給發其修理處所動支過數  
目各備細造冊開報抄案奉到日期併不違依准俱  
各呈來

呈總制三邊右都御史賈

榆林賁本承差伍全自京回稱本道已被南京科道  
論劾及按察司侯副使書至亦傳言本道被論信息  
本道自揣菲薄歷任以來委係不能諳曉時事多拂  
人情前項論劾誠非虛傳正通詳起程回籍間據延  
安府通判郭錫見署洛川縣印賁銀一千二十七兩

到道稟稱前銀係該縣知縣楊某科斂罰取所得近  
因緣事脫逃地方官兵巡邏不及取回今送本道以  
備脚力盤費等因本道切思叨竊科第二十餘年備  
員中外十有餘任無分毫補報以致人言方負愧赧  
今徒步而歸用彰黜罰猶恐不足以勵庶官若受此  
重貨不惟大累官箴抑恐重遭冥罰若不爲區處徑  
發回該縣則此銀原未經由上司後日官更吏改不  
免埋沒當即令通判郭錫同鄜州知州雷世榮判官  
張子泉眼同稱數明白傾銷成錠入匣封鎖就差張  
子泉同百戶王榮等起解本院以充軍餉除給批付

本官守候批廻外理合呈請照驗施行

方山先生全集卷之五十